

共同經課 - 1 約書亞記二十四章一節~三 a 節, 十四節~二十五節

1 約書亞聚集以色列眾支派到佇示劍, 召以色列的長老, 及 in 的族長、審判官, 以及官長來, in 就倚佇上帝的面前。2 約書亞給眾百姓講:「耶和華——以色列的上帝按呢講:『在早恁的列祖, 就是亞伯拉罕的老父, 拿福的老父、他拉, 踎佇大河彼旁, 服事別個上帝, 3 我取恁的祖亞伯拉罕對大河彼旁導伊遍行迦南全地。14 「今恁著敬畏耶和華, 誠心實意服事伊, 將恁列祖佇大河彼旁及佇埃及所服事的上帝除去, 來服事耶和華。15 若是恁掠服事耶和華做唔好, 今仔日恁著揀恁所欲服事的: 看是恁列祖佇大河彼旁所服事許個上帝? 抑是恁所倚起 in 的地亞摩利人許個上帝啊? 論到我及我的家, 阮決斷欲服事耶和華。」16 百姓應講:「阮決斷無意思欲棄揀耶和華去服事別個上帝; 17 因為耶和華——阮的上帝曾導阮及阮的列祖對埃及地做奴才的家出來, 佇阮的目矚前行許個大的神蹟, 佇阮所行一切的路, 所經過的逐國, 攏有保護阮。18 耶和華也佇阮的面前趕出攏總的百姓, 趕出倚起此個所在的亞摩利人。所以, 阮也欲服事耶和華, 因為伊是阮的上帝。」19 約書亞對百姓講:「恁袂會服事耶和華; 因為伊是聖的上帝, 決斷無容允用別個上帝匹配伊, 無欲赦免恁的過失, 恁的罪惡。20 恁若離開耶和華去服事外邦的上帝, 耶和華佇降福氣互恁了後, 欲越轉來降災禍互恁, 滅無恁。」21 百姓應約書亞講:「無啦, 阮定著欲服事耶和華。」22 約書亞對百姓講:「恁揀耶和華, 欲服事伊, 恁家已做恁的干證!」in 應講:「好, 阮做干證。」23 約書亞講:「恁今著除去恁中間所有外邦的上帝, 互恁專心歸向耶和華——以色列的上帝。」24 百姓應約書亞講:「阮欲服事耶和華——阮的上帝, 聽趁伊的話。」25 彼日, 約書亞就及百姓立約, 佇示劍給 in 設立律例法度。

共同經課 - 2 詩篇七十八篇一節~七節

1 [亞薩教示的詩。] 我的百姓啊, 恁著聽我的教示, 俯耳孔聽我的嘴的話。2 我欲開嘴設譬喻; 我欲講出古早隱密的話, 3 就是阮所聽見、所知的, 亦是阮的祖公傳互阮的。4 阮無欲將諸個事對 in 的子孫隱瞞, 欲將耶和華的名聲及伊的權能, 以及伊所行奇妙的事, 傳互後世代。5 因為, 伊佇雅各立干證的話, 佇以色列設律法; 是伊命令咱的祖公的, 通傳互 in 的子孫, 6 互後代就是得欲出世的子孫知; in 亦欲起來傳互 in 的子孫, 7 互 in 的向望在佇上帝, 無袂記得全能者的所做, 是欲遵守伊的誠命。

共同經課 - 3 帖撒羅尼迦前書四章十三節~十八節

13 兄弟啊, 論到啲暍的人, 阮毋愛恁毋知, 免得恁憂悶, 親像許個無向望的人一樣。14 因為咱若信耶穌有死有復活, 就屬耶穌來暍的人, 上帝也欲按呢導 in 及耶穌相及來。15 因為阮奉主的命令用此個給恁講: 就是主閣來的時, 咱諸個猶活啲的人, 袂會代先許個啲暍的人。16 因為主欲本身對天落來, 有大喉叫有至大天使的聲, 也有上帝的哨角; 就許個屬基督已經死的人欲代先起來。17 後來咱猶活啲的人欲及 in 受接納佇雲內, 入空中迎接主。按呢, 咱就永遠及主相及佇啲。18 所以, 著用諸個話相安慰。

共同經課 - 4 馬太福音二十五章一節~十三節

1 「彼時, 天國欲比並十個在室女, 抬 in 的燈, 出去迎接新子婿。2 其中五個蠢的, 五個智識的, 3 蠢的抬 in 的燈, 無另外帶油; 4 獨獨智識的, 抬 in 的燈另外帶油佇 in 的器具內。5 新子婿延延, 就攏盹瞌睡啲暍。6 半暍有大聲叫講:『新子婿來啦, 恁出來接伊!』7 彼時, 諸個在室女攏起來修整 in 的燈。8 蠢的給智識的講:『請將恁的油分阮, 因為阮的燈欲熄啦。』9 智識的應講:『驚了恁阮攏無夠; 卡好去對賣的人家已買。』10 去買的時, 新子婿到。許個便的, 及伊入婚姻的筵桌, 門就關。11 然後其餘的在室女亦來, 講:『主啊, 主啊, 給阮開!』12 若是伊應講:『我實在給恁講: , 我毋識恁。』13 所以, 著張持, 因為恁毋知, 彼個日, 彼個時。」